



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA.

QUOD LIBETARIIS DISPUTATIONIBUS
manè discutienda in Scholis Medicorum die Veneris tertiâ
Februarii M. DCC. XLI.

M. HYACINTHO - THEODORO BARON,
Doctore Medico, Antiquo Facultatis Decano, in locum
M. PETRI MARAIS à Facultate suffecto, Præsides.

An dum contrahitur cor, dilatentur Arteria Coronariæ.

I.



ARTERIAS, quotquot sunt, dilatari omnes ab impetu sanguinis per cordis systolem expulsi, notum est omnibus. Neminem pariter latet, eo ipso tempore quo dilatantur ventriculi cordis, Arterias contrahi. Quidam, nec inferioris notæ Anatomici*, hujus legis immunes esse Coronarias Arterias existimant. Has contracto corde contrahi, contractâ aortâ dilatari contendunt. Putant semilunares valvulas ita dilatatæ aortæ parietibus applicari, ut Coronariarum Arteriarum ostia ponè ipsas latitantia, nequa-

* Thebesius, *diff. de circul. sang. in corde* pag. 21.

Nicotai, *diatrib. mechanico anat. de directione vasorum* pag. 23 & 24.

Boerhaave *instit. Med.* §. 183. & 218.

Id. *protest. Acad. in proprias instit. cum notis Alb. Haller. vol. 2. §. 151. pag. 50. §. 157. pag. 55. §. 183. pag. 111. & 112.*

Winslow, *expos. anat. Tract. de pell. N^o. 91.*

Vieussens.

quàm pateant irruenti sanguini, quandiù cor contrahitur. Constat præterea cor in sua contractione pallefcere; unde inferunt contracti cordis Arterias ita fortiter comprimi, ut ipsarum omnino fere aboleatur cavitas, à sanguine per aortæ systolem repulso, faciliè dùm cor relaxatur dilatanda. Nec defunt qui dialtoli cordis *Synchronam* esse Arteriarum Coronariarum dilatationem probare conentur ex eo quòd, nisi per violentam aortæ contractionem repercussus sanguis in patentes Arterias Coronarias diverteret, semilunares valvulas impetu suo disrumpere, atque in ventriculùm posteriorem refluere. Etsi quamdam veri speciem præferant argumenta hætenùs memorata, nullus tamen sunt ponderis. Quippè Coronarias Arterias tunc dilatari, cum systole suà cor sanguinem in aortam jaculatur, docent contractionis musculorum phænomena, probant quæ sequerentur absurda, si res ita se non haberet, demonstrat cordis ad costas pulsatio, evincit demùm experientia non semel repetita.

I I.

INSIGNES duo ex aortæ basi hinc & inde anteriùs prodeunt furculi, Arterias dicunt Coronarias. Statim ab origine in oppositas feruntur partes. Sinister furculus, emissò priùs supra cordis convexa majori ramo ad apicem usque protenso, ventriculùm posteriorem inter & ejus auriculam inflectitur. Dexter anteriorem ventriculùm inter & ipsi adjacentem auriculam contorquetur. Uterque factò semicirculo, alter alteri extrèmo suo junguntur, basinque cordis Coronæ instar circumdant. Ex illorum conjunctione princeps exsurgit ramus, juxta planam cordis superficiem mucrone tenùs extensus, hîcque per *Anastomosis* cum ramo sinistri furculi copulatur. Omnes hi Arteriarum Coronariarum trunci, in numerosas per universum cor late disseminatas, abeunt propaggines. Non absimili modo distributæ venæ Coronariæ, adductum per arterias ad remota cordis puncta sanguinem, capillaribus hærent oculis, huncque partim in utramque auriculam exiguis foraminibus, potissimum verò in anteriorem majori trunco evomunt, partim per ductus peculiare, in fossulas quibus interna exarata est ventriculorum superficies oblique apertos, in cava cordis infundunt. Hic naturæ mireris indultiam. Contractis auriculis, constringuntur & hiantia in ipsis tùm tenuissima venarum Coronariarum ostiola, tùm majoris earundem trunci orificium, nec nisi dilatatis iisdem, appellent per venas Coronarias sanguini libera conceditur effusio. Quàm prudenti igitur consilio cautum est, ne alternis solummodo eructandus in auriculas sanguis vasa cordis opprimeret. Tantum & tale præstant beneficium, in cordis sinus opportunè producti patentescque venosi ductus. His faventibus, oclusum ad auriculas contractas offendens aditum sanguis, ad dilatatos tunc temporis deflectit ventriculos, quibus contractis ad auriculas vicissim dilatatas divergitur. Hæc arte fluxu continuo in venas Coronarias propulsus sanguis, ab iisdem fluxu haud interrupto egreditur. Nec alio fine expertes has esse valvulas, frequentique invicem communicare *Anastomosis* plurius quam verisimillimum est.

I I I.

MUSCULUS quis se se contrahendo sit crassior, durior, pallidior. Nec mirum. Contractæ fibræ in arctiores veniunt contactus. Omnia musculi substantiam pererrantia stringuntur vasa sanguinea, venosa vero prorsus exinaniantur. Sanguis undequaque pressus, magnà vi è capillaribus venulis in ramulos, ex his in ramos, ex ramis tandem in truncos, totus quantus est dicto citius expellitur, pallefcit musculus. Interea geminatis cordis siliibus per Arterias novus accedit sanguis, qui interdicto cum venis com-

3

mercio, cumlatur in vasis, turgescunt ergò, contenduntur, intumescunt, muscululque pariter turgēt & durescit. Talia meminisse quid ad rem? Ut intelligatur Arterias Coronarias eodem ac cor tempore contrahi nullo modo posse. Nec enim contrahi ulla arteria potest, quin contento sanguini pateat exitus, nec exitus ullus est Arteriarum Coronariorum sanguini, oclusa per cordis systolem venarum viâ. Restat igitur ut Arteriæ Coronariæ distendens fluidum in venas exprimant, cum relaxatur cordis antlia. Unde patet dilatari easdem non posse, nisi cum aorta dilatatur. Sed quod majus est, si Arteriæ Coronariæ dilatarentur aortæ contractione, eas nunquam esse posthac contrahendas, sequens ratiocinatio demonstrat. Arteria quacunque dum contrahitur, contentum sanguinem per utrumque extremum conatur expellere: Arteriæ igitur Coronariæ sanguinem contractione suâ, vel in venas expellent, vel aortæ tunc temporis dilatatæ restituent. Porro jam demonstravimus corde contracto, transitum ab Arteriis Coronariis in venas intercludi: aliunde sanguis à corde in aortam fortiter protusus, nisi vehementiori agit in Coronariorum orificia, quam ut illum valeat repellere vis quâ contrahuntur Arteriæ Coronariæ, has igitur dum aorta contrahitur dilatari absurdum est.

I V.

COR, in pericardio nullâ impeditum adhesionē, liberum est, nullis præterquam ad basim firmatur retinaculis. Qualis igitur debet esse sanguinis, in Arterias Coronarias quocunque tempore vibrati, actio in corpus impulsioni cuiuslibet haud difficilē obsequiosum? Eam esse vim sanguinis per arterias dum dilatantur adacti norunt omnes, ut admotos vel remotioribus à corde locis feriat digitos. Insuper sedentis hominis femore altero supra alterum decussatim imposito, appensum crus liberè propendens, obstante etiam superadditi ponderis resistentiâ, vicibus alternis ascendere ac relabi deprehenditur. Aliunde forsitan quàm à sanguinis impulsu illud repetendum esse phenomenon suspicatis? At pulsus explore, hunc & extremum pedem attolli simul, simulque deprimi observabis. Quid plura? Terebrato cranio, cerebrum & superinducta dura mater alternis per aperturam protuduntur & confidunt. Scilicet calvariæ basim perreptantes Arteriæ numero & crassitie insignes, ab impetu irrudentis per cordis systolem sanguinis dilatatæ, superimpositum remouent cerebrum, quâ datâ portâ deficientis cranii limites extrâ propellendum, moxque subsidentibus Arteriis collabendum. Quis nunc nisi planè hospes in mechanicis, tanto fortioorem illum sese à centro removendi sanguinis nifum expecturas esse arterias dissidebitur, quantò fuerint moventi potencie propiores? Qualem igitur putas purpureæ columnæ intrâ Coronarias Arterias intrusæ futurum esse effectum? Talis erit profectò, ut cor in pericardio liberè fluctuans, fortiter repulsus, valido ictu costas percutiat. Jam verò *Synchronam* esse arteriarum cordis & Carpi diastolem, demonstrat facta, dum dilatatur Radialis Arteria, cordis ad costas pulsatio. Non minus ergò manifestum sit, contracto corde, dilatari Coronarias, quàm illud, dilatatâ Radiali arteriâ, contrahi extrâ dubium est. Rationi auscultare recusas? Assensum vel invito extorquebit haud fallax experientia. Aperto canis viventis pectore, dissectoque pericardio, serpentem ad exteriora cordis Coronariam Arteriam lancollâ pertundas. Exinde subsultum facientem observa sanguinem, hunc ampliozem dum cor contrahitur, minorem dum relaxatur describere *Parabolan* eomperies. Evidenti sanè argumento, sanguinem in priori casu violentius in Coronariorum Arteriarum parietes impelli.

V.

NEC reponas, quod è sinistro cordis sinu erumpens in aortam purpureus latex, Coronariorum orificiis semilunares opponit valvulas, sicque per

4

cordis systolem, sanguini ad Arterias Coronarias obstrui aditum. Coronarium ostiola sapsissime altius posita viderunt Anatomici, quam ut ipsis præstendi potuissent valvulæ semilunares, quantumvis aortæ parietibus applicatæ. Sed valeat observatio: nequedùm obstabunt valvulæ, quin cordis systoli *Synchrona* sit Coronariarum dilatatio. Aorta sui contractione tota non vacuat; imò sanguinem versus cor repellit, valvulasque inflat Sygmoideas. Sanguis ergò subsequente cordis contractione expulsus in aortam, non prius Coronariarum aperturis valvularum vela applicabit, quam superincumbentem sanguinis columnam repulerit, Arteriis Coronariis necessariò accipiendam. At saltem contracto corde, ita subito & vehementer coangustantur illius vasa, ut novum non modò non admittant, sed & contentum expellant sanguinem. Minimè. Systole cordis coarctantur quidem disseminata per totam ipsius substantiam vasorum capillamenta, non item serpentes exterius Arteriarum Coronariarum trunci majoresque rami: imò compressionis immunes, tantò dilatantur magis, quanto fortiori impetu, ob negatum per capillaria transitum, in parietes arietat irrumpens sanguis. Metuant alii ne aortæ contractione reimpulsus vitalis liquor, semilunares distumpat valvulas; huiusque periculi avertendi causâ, opportunè hiantes mirentur Coronarias Arterias, ut scilicet divertente ad illas repercussi sanguinis parte, minori reliquis feratur vehementiâ. Inanis planè formido. Injectiones anatomicæ docent venarum valvulas, semilunaribus aortæ longè tenuiores, haudquaquàm ab immisso maximâ vi fluido posse distumpi. Sux sunt arteriæ pulmonariæ semilunares valvulæ, nulla in ipsâ hiant Coronaria vasa, sanguini diverticulum præstitura. Contractis aortâ & pulmonariâ arteriis, retrogradi versus valvulas sanguinis imperum sustinet, frangitque distendens tunc cordis ventriculos purpureum aliud liquidum.

Ergò dum contrahitur cor, dilatantur Arteria Coronariæ.

DOMINI DOCTORES DISPUTATURI.

M. Ludovicus Le Hoc, Consiliarius Medicus Regis ordinarius in ejus Castellæo.

M. Antonius-Nicolaus Guenanti.

M. Paulus-Jacobus Malouin.

M. Joannes Baptista Boyer, Regis Consiliarius & in Senatu Parisiensi Medicus ordinarius.

M. Bernardus de Jussieu, Regiæ Scientiarum Academiæ, Regiæque Societatis Londonensis Socius & in Horto Regio Botanices Prodemonstrator.

M. Franciscus Mery, Chirurgiæ Gallicæ Idiomate Professor.

M. Ludovicus de Santeul.

M. Emmanuel Mauritius Desverney.

M. Ludovicus Clandius Bourdelin, Regiæ Scientiarum Academiæ Socius, Antiquæ Facultatis Decanus, & Pharmaciam utriusque Professor.

Proponēbat Parisiis THEODORUS BARON, Parisinus;
Baccalaureus Medicus, A. R. S. H. 1741, à sextâ ad meridiem.